

# ANTIA HULANDES



MINISTER DI  
TRAFIKO I  
TELEKOMUNIKASHON

Tópiko: Minister Adriaens ta bishita Organisashon Mundial di Meteorologia

Djaluna último (4 di ougùstùs 2008), Minister di Tráfiko i Telekomunikashon Maurice Adriaens a hasi un bishita di kortesia na e Organisashon Mundial di Meteorologia (OMM) na su sede prinsipal na Genève. E la ser risibí dor di Secretario-General interino, Profesor Hong Yan.

Profesor Hong Yan a duna un presentashon riba desaroyo di klima mundial durante di último siglonan. Por a ripará klaramente akinan ku desaroyo industrial tabatin un influensha negativo riba nos medio ambiente dor di entre otro un oumento fuerte di e nivel di CO<sub>2</sub>. Dor di e subida di e nivel di CO<sub>2</sub>, temperatura mundial ta oumentá muchu mas rápido ku nunca ántes den historia. Tambe Profesor Hong Yan a indiká klaramente ku si nos no hasi nada, temperatura mundial lo subi ku mas ku kuater grado den próksimo 100 aña. E subida di temperatura aki lo tin konsekuensha grandi pa bida riba nos planeta. Partinan grandi di mundu lo seka i lo bira kada biaha mas difísil pa produsí suficiente kuminda pa duna komunidatnan di kome. Un senario hopi spantoso. Pero sigun Profesor Hong Yan nos por para e desaroyo aki ainda dor di bai biba awor na un manera mas konsiente i dor di dispidí ménos energia (produsí ménos CO<sub>2</sub>).

Mas aleu, Profesor Hong Yan a indiká ku OMM ta dispuesto di yuda Antianan Hulandes ku material di informashon pa eduká nos pueblo relashoná ku kambio di klima. Tambe ela indiká ku OMM lo tene otro aña un konferensia mundial riba e tema aki i ku ta importante pa nos Minister-Presidente partisipá na e evento aki pa enfatisá importansha di e problema aki.

Durante di e bishita, Minister Adriaens a probechá di e oportunitat pa presentá na OMM kopia di un publikashon na Papiamentu di nos Servisio Meteorológiko ku yama “We care for our Climate: Nos ta kuida nos klima”. Intenshon ta pa repartí e publikashon aki na nos skolnan pa konsientisá hubentut mas tantu ainda di nos klima. Profesor Hong Yan a indiká ku e ta apresιά inmensamente e iniciativa aki di nos propio Servisio Meteorológiko i ku e lo duna e publikashon aki un lugá den biblioteka di OMM.



Riba e potrèt nos ta mira Profesor Hong Yan ora ku e ta risibí e publikashon di Minister Adriaens.